

PREDMET: Učešće Bosne i Hercegovine u programu Erasmus+; Poziv za dostavu projektnih prijedloga za 2024. godinu (Call for proposals 2024 - EAC/A07/2023 – Erasmus+ Programme) – informacija, dostavlja se, dalje postupanje, traži se

Poštovani,

Posredstvom Erasmus+ ureda u Bosni i Hercegovini, obaviješteni smo da je Evropska komisija objavila „Poziv za dostavljanje projektnih prijedloga u okviru programa Erasmus+“ za 2024. godinu (Call for proposals 2024 – EAC/A07/2023 – Erasmus+ Programme).

Podsjećamo da je Erasmus+ program Evropske unije za obrazovanje, obuku, mlade i sport, a obuhvata period od 2021. do 2027. godine. Program je bitan element za ostvarenje ciljeva evropskog prostora obrazovanja, Akcijskog plana za digitalno obrazovanje za period 2021 – 2027, strategije Evropske unije za mlade i plana rada Evropske unije u području sporta u period 2021 – 2024. godina.

Opći cilj Programa je cjeloživotnim učenjem podržati obrazovni, profesionalni i lični razvoj ljudi u oblasti obrazovanja, obuke, mladih i sporta u Evropi i šire, što pridonosi održivom rastu, kvaliteti radnih mjesta, socijalnoj koheziji, poticanju inovacija, te jačanju evropskog identiteta i aktivnoga građanstva. Program je kao takav bitan instrument za izgradnju evropskog prostora obrazovanja i podsticati će provođenje evropske strateške saradnje u oblasti obrazovanja i obuke, uz osnovne sektorske programe.

U oblasti Međunarodne dimenzije Erasmus+ programa, u oblasti **obrazovanja** otvorene su sljedeće akcije za međunarodnu saradnju za period 2021 – 2027:

- **Međunarodna kreditna mobilnost (ICM)** – Projekti mobilnosti studenata i osoblja između država članica Evropske unije ili pridruženih trećih zemalja i nepridruženih trećih zemalja. Period studiranja ili pripravnštvo u inostranstvu mora biti dio studentskog studijskog programa da bi stekao diplomu. Bosna i Hercegovina ima mogućnost učešća kao **partner**.
- **Zajednički master studiji Erasmus Mundus (EMJM)** – Visokokvalitetni međunarodni integrirani magistarski programi sa stipendijama koje finansira Evropska unija za privlačenje izuzetnih studenata. Bosna i Hercegovina ima mogućnost učešća kao **aplikant/partner**.
- **Projekti za pripremu združenih diplomskih master studija Erasmus Mundus (EMDM)** – Projekti za osmišljavanje i uspostavljanje zajedničkih master programa. Bosna i Hercegovina ima mogućnost učešća kao **aplikant/partner**.
- **Projekti izgradnje kapaciteta iz oblasti visokog obrazovanja (CBHE)** – Podrška modernizaciji i reformi visokoškolskih institucija i sistema u zemljama širom svijeta. Bosna i Hercegovina ima mogućnost učešća kao **aplikant/partner**.
- **Jean Monnet akcije (JMA)** – Izvršnost u nastavi i istraživanju u području studija Evropske unije diljem svijeta. Bosna i Hercegovina ima mogućnost učešća kao **aplikant/partner**.

- **Projekti izgradnje kapaciteta u stručnom obrazovanju (CBVET)** – Projekti podržavaju relevantnost, dostupnost i odziv institucija i sistema stručnog obrazovanja i osposobljavanja. Bosna i Hercegovina ima mogućnost učešća kao **partner**.

U oblasti Međunarodne dimenzije Erasmus+ programa za period 2021 – 2027, za oblast **mladih**, otvorene su sljedeće akcije:

- **Mobilnost za mlade, omladinske radnike** – Projekti koji okupljaju mlade ljude iz različitih zemalja radi razmjene i učenja izvan svog formalnog sistema obrazovanja. Bosna i Hercegovina ima mogućnost učešća kao **aplikant/partner**.
- **Projekti izgradnje kapaciteta u oblasti mladih (CBY)** – Podrška neformalnom učenju i mobilnosti, te aktivnosti na podizanju kapaciteta omladinskih organizacija u partnerskim zemljama obuhvaćenim akcijom. Bosna i Hercegovina ima mogućnost učešća kao **aplikant/partner**.
- **Virtuelne razmjene u visokom obrazovanju i mladima** – Projekti virtuelnih razmjena sastoje se od aktivnosti povezivanja ljudi putem interneta kojima se promoviraju međukulturni dijalog i razvoj mekih vještina. Svim mladima omogućuju pristup visokokvalitetnom međunarodnom i međukulturnom (formalnom i neformalnom) obrazovanju bez fizičke mobilnosti. Bosna i Hercegovina ima mogućnost učešća kao **partner**.

Službeni tekst poziva za podnošenje aplikacija za 2024. godinu se nalazi na linku [EUR-Lex - C/2023/01262 - EN - EUR-Lex \(europa.eu\)](https://eur-lex.europa.eu/legal-content/EN/TXT/PDF/?uri=CELEX:32023C01262&from=doctrines), a više informacija o pojedinačnim akcijama i mogućnostima možete dobiti kroz novi Programski Vodič koji je objavljen 28. 11. 2023. godine i koji je dostupan na linku https://erasmus-plus.ec.europa.eu/sites/default/files/2023-11/2024-Erasmus%2BProgramme-Guide_EN.pdf.

Poštujući regulirane nadležnosti za pitanja obrazovanja i mladih u Bosni i Hercegovini, ljubazno molimo da predmetnu informaciju učinite dostupnom potencijalnim zainteresiranim aplikantima iz vaše nadležnosti.

S poštovanjem,

SEKRETAR MINISTARSTVA

Biljana Čamur Veselinović

Dostavljeno:

- naslovu
- a/a